

№993 2015 წლის 18 მაისი ქ. თბილისი

**საქართველოსა და რეკონსტრუქციისა და განვითარების საერთაშორისო ბანკს
(IBRD) შორის 2014 წლის 3 სექტემბერს გაფორმებული სასესხო
ხელშეკრულებით გათვალისწინებული 220 კვ საჰაერო ელექტროგადამცემი
ხაზის „ახალციხე-ბათუმის“ მშენებლობის პროექტის II სეგმენტის პირველი
სექციის (კმ 0 - კმ 19,2) განხორციელებასთან დაკავშირებით
გასატარებელი ღონისძიებების შესახებ**

1. ცნობად იქნეს მიღებული საქართველოს ენერჯეტიკის სამინისტროს მიერ წარმოდგენილი ინფორმაცია საქართველოსა და რეკონსტრუქციისა და განვითარების საერთაშორისო ბანკს (IBRD) შორის გაფორმებული სასესხო ხელშეკრულების (ელექტროგადამცემი ქსელის გაძლიერების პროექტი) ფარგლებში (რეატიფიცირებულია საქართველოს პარლამენტის 2014 წლის 2 ოქტომბრის №2683-1ს დადგენილებით) ახალციხე-ბათუმის 220 კვ ორჯაჭვა ელექტროგადამცემი ხაზის მშენებლობის პროექტის ზემოქმედების არეალში მოქცეულ მოსახლეობასა და მიწის ნაკვეთებთან დაკავშირებით განსახორციელებელი ღონისძიებების შესახებ, რომელიც ასახულია IBRD-სთან შეთანხმებულ განსახლების პოლიტიკის ჩარჩოდოკუმენტში.

2. შეთანხმებულ იქნეს მსოფლიო ბანკის მიერ 2015 წლის 12 მარტს შეთანხმებული ახალციხე-ბათუმის 220 კვ-იანი ორჯაჭვიანი საჰაერო

ელექტროგადამცემი ხაზის მშენებლობის პროექტის II სეგმენტის პირველი სექციის (კმ 0 - კმ 19,2) განსახლების სამოქმედო გეგმა (RAP).

3. სს „საქართველოს სახელმწიფო ელექტროსისტემა“, IBRD-სთან შეთანხმებული განსახლების პოლიტიკის ჩარჩოდოკუმენტისა და განსახლების სამოქმედო გეგმის შესაბამისად:

ა) მოახდინოს ახალციხიდან ბათუმამდე 220 კვ ორჯაჭვა ელექტროგადამცემი ხაზის მშენებლობის პროექტის II სეგმენტის პირველი სექციის (კმ 0 - კმ 19,2) ზემოქმედების არეალში მოხვედრილი მოსახლეობისგან პროექტის მიზნებისთვის საჭირო მიწის ნაკვეთების, მასზე დამაგრებული შენობა-ნაგებობების (ქონების) სარეგისტრაციო თანხის ანაზღაურება, საჭირო მიწის ნაკვეთებისა და ქონების გამოსყიდვა და სხვა სახის კომპენსაციის გაცემა. ამ განკარგულებით გათვალისწინებულ პროექტზე ვრცელდება საქართველოს მთავრობის 2011 წლის 29 დეკემბრის №509 დადგენილებით დამტკიცებული „საქართველოს იუსტიციის სამინისტროს მმართველობის სფეროში მოქმედი სსიპ – საჯარო რეესტრის ეროვნული სააგენტოს მიერ გაწეული მომსახურების საფასურის განაკვეთები, საფასურის გადახდევინების წესი და მომსახურების ვადების“ მე-6 მუხლის „უ“ ქვეპუნქტით გათვალისწინებული შეღავათები;

ბ) უზრუნველყოს ასაშენებელი ახალციხე-ბათუმის 220 კვ-იანი ორჯაჭვიანი საჰაერო ელექტროგადამცემი ხაზის პროექტის ზემოქმედების ქვეშ მოქცეული, ანძის პოლიგონების განთავსებისათვის საჭირო, სახელმწიფო, აჭარის ავტონომიური რესპუბლიკის, შუაჩვევისა და ქედის მუნიციპალიტეტების საკუთრებად რეგისტრირებული ან/და დასარეგისტრირებელი ქონების იდენტიფიცირება, დასარეგისტრირებელი ქონების რეგისტრაციისათვის საჭირო შესაბამისი დოკუმენტაციის მომზადება და აღნიშნულ ქონებაზე საკუთრების უფლების რეგისტრაციის მიზნით, ამ დოკუმენტაციის სსიპ – საჯარო რეესტრის ეროვნული სააგენტოსათვის

საკუთრების უფლების რეგისტრაციის მოთხოვნის უფლებამოსილების მქონე უწყებისათვის წარდგენა.

4. ეთხოვოს აჭარის ავტონომიური რესპუბლიკის მთავრობას, ქედისა და შუახევის მუნიციპალიტეტებს:

ა) ამ განკარგულების მე-3 პუნქტის „ბ“ ქვეპუნქტით გათვალისწინებული იმ ქონების, რომელიც რეგისტრირებულია მათ საკუთრებაში, სახელმწიფოს საკუთრებაში გადაცემის საკითხის განხილვა, კანონმდებლობით დადგენილი წესის შესაბამისად;

ბ) ამ განკარგულების მე-3 პუნქტის „ა“ ქვეპუნქტით გათვალისწინებულ იმ ქონებაზე, რომელიც იმყოფება ახალციხიდან ბათუმამდე 220 კვ ორჯაჭვა ელექტროგადამცემი ხაზის მშენებლობის პროექტის II სეგმენტის პირველი სექციის (კმ 0 - კმ 19,2) ზემოქმედების არეალში მოხვედრილი მოსახლეობის სარგებლობაში, განახორციელონ სათანადო ღონისძიებები მოსახლეობის მიერ აღნიშნული ქონების სსიპ – საჯარო რეესტრის ეროვნულ სააგენტოში საკუთრების უფლებით რეგისტრაციის ხელშეწყობის მიზნით.

5. დაევალოს საქართველოს ეკონომიკისა და მდგრადი განვითარების სამინისტროს მმართველობის სფეროში მოქმედ სსიპ – სახელმწიფო ქონების ეროვნულ სააგენტოს, უზრუნველყოს, კანონმდებლობით დადგენილი წესის შესაბამისად, ამ განკარგულების მე-3 პუნქტის „ბ“ ქვეპუნქტით გათვალისწინებული ქონებისა და ამ განკარგულების მე-4 პუნქტის „ა“ ქვეპუნქტის შესაბამისად, სახელმწიფო საკუთრებაში გადაცემული ქონების სს „საპარტნიორო ფონდის“ კაპიტალში შეტანა, შემდგომში სს „საპარტნიორო ფონდის“ მიერ ამავე ქონების სს „საქართველოს სახელმწიფო ელექტროსისტემის“ კაპიტალში შეტანის მიზნით.

6. სს „საქართველოს სახელმწიფო ელექტროსისტემის“ მიმართვისა და კანონმდებლობით გათვალისწინებული დოკუმენტაციის წარდგენის

შემდეგ, საქართველოს იუსტიციის სამინისტრომ და მისი მმართველობის სფეროში მოქმედმა სსიპ – საჯარო რეესტრის ეროვნულმა სააგენტომ უზრუნველყონ, ამ განკარგულების მე-3 პუნქტით გათვალისწინებული, სასოფლო-სამეურნეო დანიშნულების მიწის ნაკვეთების მიზნობრივი დანიშნულების შეცვლა, მოქმედი კანონმდებლობის შესაბამისად.

პრემიერ-მინისტრი

ირაკლი ღარიბაშვილი